

中晚唐诗叩弹集





中晚唐诗叩弹集

杜紫纶 杜治毅 撰

北京市中国书店



6111128/24 06

据采山亭藏版影印

中晚唐诗叩弹集（全二册）

出版：北京市中国书店

发行：北京市新华书店

印刷：通县财联印刷厂

1981年12月第一版 1981年12月第一次印刷

开本：787×1092 1/32 印张：25.625

定价：5.10元

余屏却塵蹤棲遲泉石庭帷薜荔長對嶠嶺院落梧
桐罕聞剝啄乃者浣花才子攜李名家委婉銀塘並
繫青簾之櫺聯翩玉趾竭來紅豆之村曾倒屣以未
遑顧開槭而有喜濯薔薇之露觸手香生繡芍藥之
篇驚心豔絕凌厲則風雲變色裴徊而山谷傳聲蓋
繇杼軸乎羣言乃能權衡於一代論詩自品彙以還
專遶中晚名集本平原之賦自比叩彈不拘風格之
同維以情辭為主緬有唐之中葉丁大雅之垂秋初
以銅馬遺氣縱橫河朔既而金貂煽虐燔灼清流戰
起元黃衙分水火旋颺回而霧塞真地老以天荒翠
輦頻移延秋之夜烏誰托紅蕉罷唱絃干之凍雀無

歸彼有人焉何嗟及矣生斯世也能不悲哉於是戀
國孤忠憂時野老或炳識幾先早披誠而風諭或浮
沉局外但矢志于歌謠美人香草無非寄恨之詞行
路關山大有緣情之什既悲涼而慷慨亦惻愴以纏
綿本此深衷流為絕調有類風人之比興可備盛世
之箴規者也猶慮榛楛勿翦殊傷集翠之榮硤硤兼
收或損連城之貴辨淄澠而靡爽攷殿軍以尤巖若
夫詮釋名言廣徵七略搜羅掌故旁撫百家疑析毫
芒趣窮隱伏不獨辨蟲魚於爾雅亦寓衮鉞于陽秋
矣二子家藏武庫雅號書淫杜曲樊川一門雙璧鴛
湖蓉水異地同心夢繞春池闌暈碧裁紅之巧林聯

夜雨殫然脂弄墨之勤從知賦出金聲鷄林增價會
見書成石室藜閣分輝將用斯集為乘韋或即予言
為蒿矢云尔

康熙甲申季秋恒齋秦松齡書



口列集

癸未春余與家詒穀讀書鴛湖之上間爲詩歌因相
與論次唐人詩自長慶以下得三十有七人詩凡一
千六百十四篇取平原抱景咸叩懷響畢彈之意名
之曰叩彈集或疑世之選詩者皆以盛唐爲宗茲顧
錄其所棄何也夫語詩之病曰好盡而易俚人之情
與境相搏而詩生焉故發於不自禁而或至於盡流
於無所擇而或入於俚而依永和聲之道存焉者寡
矣於是道之以蘊藉渟蓄使進乎雋永超詣而盛唐
之選尚焉夫唯探索久閱歷深幾得古人之神韻者
爲能抑之而愈深約之而愈啗而世之效之者務摧
折磨耗其怒生之氣濃厚之情揣摩影響緣飾皮毛

爭隱現於毫芒較重輕於杪忽其初感之機與夫欲言之故在若存若亡之間其詩雖工而其人之神已離矣於是才俊之士又厭其拘斥其質遂欲盡沒古人之樊籬而向者之病又作蓋自唐迄今詩之盛衰往復相勝相激每令學者眩惑莫能自主然吾觀三百篇中一唱三歎詞繇不殺而人不慮其盡也男女贈答行路歌謠草木蟲魚嬉戲號怒無所不備而人不病其俚也是其中有本焉師乙論歌詩曰直己而陳德趙孟請七子賦詩曰亦以觀子之志誠有不得而齊者矣如執一格以繩之將噍殺譚諧廣賁之音不當在寬裕肉好之列而詠歎淫液與發揚蹈厲之

狀不得爲盛世之樂也其可乎唐人如白香山以迄
羅韋諸家不拘蹊徑直抒胸臆或因時感憤或緣情
綺靡使神無不暢景無不宣而好色不淫怨誹不亂
之旨未嘗不存乎其間求所謂盡與俚者不可得能
使學者疏濬心靈發皇耳目不致美曠學步以自抹
殺其性情此叩彈之所由選也若別體裁扶風雅則
俟當世之知言者錫山杜詔

例言

唐詩選絕少善本唯品彙庶稱大觀然詳初盛而略中晚中晚則詳貞元以前而略元和以後夫詩有正有變正唯一格變出多岐觀其盡態以極妍勢必兼收而竝采是選不及元和以上者蓋以品彙所收今已家弦戶誦匪謂後來居上政恐數見不鮮云爾

品彙以渾成含蓄爲宗是選以才調風情爲主鴻濛旣鑿風氣斯開作者旣各踵事增華讀者寧能膠柱鼓瑟唯放其才情之所至而馴造乎神韻之自然則此編者未必非初盛之階梯而品彙之鼓吹也遞相祖述轉益多師少陵緒言具在若曰別設門庭則余

三才集
豈敢

唐人至白香山獨闢杼機擺脫羈紲於諸家中最爲
浩瀚比之少陵一則泰山喬岳一則長江大河憂樂
不同而天真爛漫未嘗不同也難易不一而沈著痛
悛未嘗不一也學者熟之可以破拘攣洗塗澤故是
選以香山爲始所錄亦獨多自元微之以下各以類
及而世次先後或不盡拘其去取大槩每於卷末略
附管見茲不具載

作者俱有小傳皆援据正史史未載者參考諸選以
備知人論世之義雖云闕疑而傳信不免孤陋而寡
聞唯博學君子正其紕繆有厚幸焉

晚唐古詩寥寥五律有絕工者要亦一鱗片甲而已
唯七言今體則日益工緻婉麗雖氣雄力厚不及盛
唐而風致才情實爲前此未有蓋至此而七言之能
事畢矣故此體在選中幾居其半

凡遇典故多采新舊諸名家箋注不揣固陋間有增
補或訂正處加某按字至或作者寓意曲折非訓詁
所及者爲之參訂時事略爲闡發倣錢氏箋杜之意
挂漏之譏所不免耳

唐詩唯中晚未有全刻錫山中翰顧梁汾先生鈔集
唐詩最富前宮允嚴蕩漁先生亦有中晚選本家紕
綸兄嘗從兩先生遊是選頗資考索淵源所自不敢

忘也

是選始於癸未春余與紫綸兄手自摘鈔本爲巾箱
吟賞之具未敢公之同好也 家大人督課之暇偶
見副本喜曰二子用心良苦盍出而是正乎遂與黎
棗之工并識芻蕘之見蠡測管窺知無裨於大雅筌
魚蹄兔或少助於初機而已

康熙甲申暮春旣望秀水杜庭珠識

中晚唐詩叩彈集目錄

卷一

白居易_上

五十首

卷二

白居易_下

八十首

元稹

五十首

卷三

張籍

六十四首

王建

九十八首

卷四

李賀

七十九首

孟郊

三十一首

卷五

鮑溶

三十五首

姚合

二十八首

朱慶餘

二十四首

張祜

五十五首

卷六

杜牧

七十首

許渾

六十四首

卷七

李商隱

一百二十首